

اپنی گل



پہاڑی زبان ریاست جموں و کشمیر نے اک بڑے طبقے فی زبان ہے تہ اسراں اس فی اک خاص اہمیت وی ہے تہ خاصیت وی۔ حکومت جموں و کشمیر نے مادری زبانان کی اسکولاں نے تدریسی نصاب ناحصہ بنانے والے حکم نامے نے تحت پہاڑی زبان کی وی اس عمل ناحصہ بنایا گیا ہے۔ اس فیصلے نال ریاست فی تری بڑی زبان نے بولنے والیاں فی اک دیرینہ مانگ پوری ہون نے نال نال انہاں بچیاں کی اپنا حق ملایا جہاں فی کہ ایہہ مادری زبان ہے۔

ریاستی تعلیمی بورڈ ایہہ کوشش کیتی ہے جے پہاڑی زبان نیاں تدریسی کتاباں کی نویں تعلیمی پالیسی سنگ ہم آہنگ کیتا جائے تہ مُلک پھر بچ جیہڑا معیارِ تعلیم قائم کیتا گیا ہے، اُس کی نظراں اگے رکھی تہ پہاڑی زبان نیاں درسی کتاباں کی اُسے معیار نے مطابق تیار کری بچیاں تکر پُچایا جائے۔ اسے غرض نال ریاستی تعلیمی بورڈ ”پھلوڑ“ نے ناں نال پہاڑی نیاں درسی کتاباں نا سلسلہ اپنے حُسن انجام تکر پُچایا ہے ہور زیر نظر کتاب جیہڑی چھیمی جماعت نے طالب علماں واسطے تیار کیتی گئی ہے، اسے سلسلے فی اک کڑی ہے۔ اس کتاب فی تیاری ویلے منے پڑ منے نے لسانی اصولاں کی نظراں اگے رکھیا گیا ہے۔ کتاب نامنڈ ہلا مقصد طالب علماں کی زبان نیاں بُیادی ضرورتاں تہ نزاکتاں تھیں واقف کرانا ہے۔ انہاں کی املا ہور اس نے متعلق دُویاں او بکھتاں (دشواریاں)

تھیں روبرو کرایا جانی سکے تاں جے اوہ آسانی نال پہاڑی زبان لکھی پڑھی سکے۔ آساں کی پکی میند ہے جے اس کتاب کی غور نال پڑھنے تہ سمجھنے تھیں بعد طالب علماں کی اگلیاں جماعتاں بچ پڑھائیاں جانے والیاں کتاباں پڑھنے تہ سمجھنے بچ آسانی ہو سی گی۔

اس کتاب نی ترتیب تہ تدوین جیہڑیاں ورکشاپاں منعقد کیتیاں گئیاں انہاں بچ زبان نے ماہراں تہ تجربہ کار استادان حصہ کھنڈا تہ اپنے قیمتی مشوریاں نال نوازیآ۔

اسیں مؤلفین (ڈاکٹر مرزا فاروق انوار ڈاکٹر جہانگیر دانش راجہ نذر بونیاری امتیاز نسیم ہاشمی تہ جاوید کملاک) ہوراں نے شکر گزار ہاں جہاں اس کتاب کی ترتیب دتا۔ میں ذاتی طور اُپر ڈائریکٹر اکیڈمیک جناب فاروق احمد پیر اسٹنٹ ڈائریکٹر جناب یاسر حمید سروال تہ اکیڈمیک آفیسر ڈاکٹر انور ادھا شرماجی نی وی شکر گزار ہاں جے انہاں وی اس سلسلے بچ تند ہی نال کم کیتا۔ اس تھیں علاوہ میں جناب عبدالواحد منہاس ہوراں نی وی بہوں شکر گزار ہاں جے انہاں اس کتاب کی نہ صرف کمپوز کیتا سگوں اس نام نہ متھا وی سنواریآ۔

اخیر بچ میں استادان اگے گزارش کر ساں جے اوہ اپنے تجربے نی لوہ بچ اس کتاب کی مزید بہتر بنانے واسطے اپنے قیمتی مشوریاں تہ تجویزاں تھیں نوازن تاں جے اگلا ایڈیشن ہور وی چنگا پیش کیتا جانی سکے۔

پروفیسر وینا پنڈتا

چیر پرسن سٹیٹ بورڈ آف سکول ایجوکیشن